

桃花扇名人小史目次

侯朝宗	一至六
李香君	六至七
陳定生	七至九
吳次尾	九至一〇
楊龍友	一〇至一一
張瑤星	一一至一二
藍田叔	一二
史可法	一三
左良玉	一三至二四
柳敬亭	二四至二八
丁繼之	二八至二九
張燕筑	二九

桃花扇名人小史 目次

二

沈公憲	二二〇
徐青君	二二〇
李貞麗	二二〇至二二一
卞玉京	二二一至二二一
寇白門	二二一至二二三
鄭妥娘	二二三

桃花扇名人小史

侯朝宗

方明季啟禎之間。逆閹魏忠賢徒黨。與正人君子各立門戶。而一時才俊雄傑之士。身不在位。奮然爲天下持大義者。有四公子。其四公子者。桐城方密之以智。如臯冒辟疆。襄宜與陳定生。貞慧與商邱侯朝宗。方域。而侯公子尤以文章著。公子祖曰太常公執蒲。父曰司徒公恂。叔曰司成公恪。皆以東林忤逆閹。先後罷官。而司徒公羅禍最酷。下請室者再。公子爲司徒公第三子。生而穎異。讀書嘗兼數人。幼隨司徒公官京師。旣慷慨盱衡。好言天下大計。束髮歸。輒冠一軍。爲文若不經思。下筆千萬言立就。僭昆弟輩。及里中諸子。創社雪苑。與四方聲氣相應。和一時有吳侯徐劉之目。性豪邁。不受羈束。嘗讀書東園。時太常公家居。課諸孫嚴甚。公子每携季弟逸出。選伎徵歌數數。然終不荒所業。已以郡學生例入南雍。應留都京兆試。留都故佳麗地。海內賢豪輻輳。論交把臂。馳騫於詩酒聲色之場。公子遨遊其間。人人引重。無不願交。恐後。以是名益盛。意氣殊自得也。雅嗜聲技。解音律。買童子吳閩。延名師教之。身自按譜。不使有一字謬錯。縱或賓筵轟飲。高談雅辯。滑稽嘲笑之時。或對客揮毫。賦詩屬文。裁答東如流水。耳聽目攝。心度口酬。他人傍觀。五色眩矇。而公子兼綜並理。洋洋若平常。脫或白雪偶乖。紅牙稍越。曲有誤。周郎願聞聲先覺。雖梨園老弟子。莫不畏服其神也。初司徒公亦留意於此。蓄家樂。務使窮態極工。致令小童隨侍入朝班。審語諸大老賢奸忠佞之狀。一切效之排場。取神似逼真。以爲笑噱。至是投老寂寞。公子

乃敎成諸童。挈供堂上。歡司徒公爲色喜。而里中樂部。因推侯氏爲第一也。公子雖豪舉乎。然心不忘國家之故。彌敦氣節。詡詡負經濟。頗思自見其才。會大賊李自成蹂躪河南。破四郡。圍汴急。朝命起司徒公督師。解汴圍。賜尙方劍。得便宜行事。於是公子立進計。請用賜劍。誅督師許定國。以謀師之罪。而破文法。斬一甲科守令之不應徵辦者。庶幾事集威行。然後疾驅渡河。收中原。土塞團結之衆。以合左良玉於襄陽。約陝督孫傳庭。犄角並進。則汴圍不救自解。毋徒遵朝志之所向者。其孰與幾之。故特爲小傳。以彰其微焉。見壯梅堂文集

侯方域。字朝宗。商丘人。祖執蒲。官太常卿。父尚。崇禎間。官戶部尙書。方域旣世家子。幼從其父官京師。習知中朝事。而于君子小人門戶始終之故。尤熟。悉喜結納名士。與貴池吳應箕。宜興陳貞慧。最善。阮大鍼者。故魏奄義兒。屏居金陵。謀復用。諸名士共爲檄。數大鍼罪。應箕貞慧主之。大鍼愧且悲。然無可如何。詎知方域與二人者。相善也。私念得交侯生。因侯生以交於二人。事當已。乃屬其客陽交。惟方域。方域覺之。謝客不與通。時大鍼家有伶一部。以聲伎擅名。能歌所演劇。號燕子箋者。又值諸名士以試事集金陵。朝宗置酒高會。趣徵阮伶。大鍼心竊喜。立遣伶往。而令他奴誦之。方度曲。四座稱善。奴走告。大鍼心益喜。已而抗聲論天下事。箕踞叫喚。語稍及大鍼。遂戟手罵。詈不絕口。大鍼聞之。乃大怒。而恨三人者尤刺骨。後數年。南都擁立。大鍼驟柄用。與大獄。將盡殺黨人。捕貞慧入獄。應箕亡命。方域夜出走。渡揚子。依鎮帥高傑得免。方域儻蕩。任俠使氣。好大言。遇人不肯平視。然一語合輒吐出。肺肝譽之不容口。援友之阨。能不倖千金。然亦喜匪眦報復。居鄉時。扞文網。崇禎末。劇寇李自成圍汴。急。詔侯恂出督師。援汴。方域進曰。大人受命討賊。廟堂議論牽制。奏請不應。徵調難集。願破文法。以期劍首誅一

甲科令守。而晉師許定國師譟。當斬以徇軍。事辦成立。疾驅渡河。就左良玉於襄陽。約陝督孫公傳庭犄角於秦。賊乃可圖也。恂叱曰。是跋扈也。小子多言。輒遣歸。方域既負才名。以明經累舉於鄉。輒報罷。尋邑邑致疾。卒年三十有七。是歲順治十一年也。明季古文辭。自嘉隆諸子。貌爲秦漢。稍不厭衆望。後乃爭矯之。而矯之者。變逾下。明文極敝。以迄於亡。朝宗始倡韓歐之學於舉世。不爲之日。遂以古文雄視一世。末年游吳下。將刻集。集中文未脫稿者。一夕補綴立就。人益奇之。既沒。而文章乃大著。初陳貞慧就逮。入詔獄。鍛練久之。會大鉞敗。脫歸。後十餘年卒於家。見部長密青門旅稿

侯方域字朝宗。商丘人也。幼博學。隨父司徒官京師。習知中朝事。嘗歎曰。天下且亂。所見卿大夫。殊無足以佐中興者。其殆不救乎。去遊金陵。爲一時所引重。尤負氣。阮大鉞願與交。不肯往。後大鉞與黨人獄。欲殺方域。渡揚子。依高傑得免。豫王師南下。傑已死。方域說其軍中大將。急引兵斷盱眙浮橋。而分揚州水軍爲二。戰不勝。則己。一由秦興趨江陰。據常州。一由通州趨常熟。據蘇州財賦之地。跨江連湖。障蔽東越。徐圖後計。大將不聽。以銳甲十萬降。從其軍渡江。授官辭歸。明思宗時。劇寇李自成破河南四郡。圍汴。司徒出視師。方域嘗進計曰。大人受討賊重任。師終一旅。廟堂言議。牽制難行。奏乞兵糧甲仗。皆遠在數千里外。不可猝得。今賜劍。久虛不用。願破文法。首狗一甲科令守。諸所徵辦。旬日便集。晉帥許定國師譟。當立斬之。以明軍法。亦不須奏。事辦成立。疾驅渡河。中原土塞團結之徒。不下數十萬。皆願自効。自効宜毋間所從來。收而將之。就左良玉於襄陽。約孫陝督犄角并進。賊乃可圖。將在軍。君命有所不受。今責救汴。汴守堅未易下。舍之乃所以救之也。司徒曰。如此是我先跋扈矣。小子

多言不宜在軍。遣還吳道。遇永城叛帥劉超。挾之問曰。與若有舊。今獨不一言救超死耶。方域曰。君所坐不過殺一御史。奈何據反。今三輔有警。君能兼行赴救。負義之甲。即勤王之旅。勝固立功。敗則以一死殉國。策之上也。急自縛往見吾父。儻待奏命。朝廷方姑息戎臣。君未必死。不然亦免族滅。次也。南歸率羣賊出永城門。往來宛洛間。觀變通誅。我即不言。亦必有爲君畫者。然如此則真反矣。願君無以爲意。超服其言。亦不殺也。方域豪邁多大略。少本有濟世志。嘗與吳應箕夏允彝。醉登金山。指評當世人物。臨江悲歌。二子以方域比周瑜王猛。己卯舉南省。第三人以策語觸諱黜。辛卯舉豫省第一人。有忌之者。復斥不錄。既不見用。乃放意聲伎。已而悔之。發憤爲詩歌。古文論者謂其詩追少陵。古文出入韓歐。其應制文尤自成一家。從來作者皆不能兼。獨方域兼之。今觀其集。非虛語也。武威賈開宗撰。見壯梅堂文集

弘光元年。侯子從興平伯高傑北征。傑死。復返廣陵。按是歲五月。豫王師至揚州。諸將奔海陵。已而來降。侯子歸里。傑故部曲大帥李本身等前驅渡江。克金陵。十月隨至京師。見四憶堂詩集賈靜子註。右我昔詩詩不錄。

僕竊聞君子處己不欲自恕。而苛責他人以非其道。今執事之於僕。乃有不然者。願爲執事陳之。執事僕之父行也。神宗之末。與大人同朝。相得甚歡。其後乃有欲終事執事而不能者。執事當自追憶其故。不必僕言之也。大人削官歸。僕時方少。每侍未嘗不念執事之才。而嗟惜者彌日。及僕稍長。知讀書。求友金陵。將戒途。而大人送之曰。金陵有御史成公勇者。雖於我爲後進。我常心重之。汝至當以爲師。又有老友方公孔炤。汝當時刺拜於床下。語不及執事。及至金陵。則成公已得罪去。僅見方公。而其子以智者。僕之夙交也。以此晨夕過從。執事與方公同爲

父行。理當謁。然而不敢者。執事當自追憶其故。不必僕言之也。今執事乃責僕與方公厚。而與執事薄。噫。亦過矣。忽一日。有王將軍過僕甚恭。每一至。必邀僕爲詩歌。既得之。必喜。而爲僕貰酒奏伎。招遊舫。攜山屐。殷殷積句不倦。僕初不解。旣而疑以問將軍。將軍乃屏人以告僕曰。是皆阮光祿所願納交於君者也。光祿方爲諸君所詬。更以道之君之友陳君定生。吳君次尾。庶稍滿乎。僕飲容謝之曰。光祿身爲貴卿。又不少佳賓客。足自娛。安用此二三書生爲哉。僕道之兩君。必重爲兩君所絕。若僕獨私從光祿遊。又竊恐無益光祿。辱相款八日。意良厚。然不得絕矣。凡此皆僕平心稱量。自以爲未甚太過。而執事顧含怒不已。僕誠無所逃罪矣。昨夜方寢。而楊令君文聽叩門過僕曰。左將軍兵且來。都人洶洶。旣光祿鬪言於清議堂。子與有舊。且應之於內。子盍行乎。僕乃知執事不獨見怒。而且恨之。欲置之族滅而後快也。僕與左誠有舊。亦已奉熊尚書之教。馳書止之。其心事尙不可知。若其犯順則賊也。僕誠應之於內。亦賊也。士君子稍知禮義。何至甘心作賦。萬一有焉。此必日暮途窮。倒行而逆施。若昔日乾兒義孫之徒。計無復之。容出於此。而僕豈其人耶。何執事文織之深也。竊怪執事常願下交天下士。而展轉蹉跎。乃至嫁禍而滅人之族。亦甚違其本念。倘一旦追憶天下士所以相遠之故。未必不悔。悔未必不改。果悔且改。靜待之數年。心事未必不暴白。心事果暴白。天下士未必不接踵而至執事之門。僕果見天下士接踵而至執事之門。亦且隨屬其後。長揖謝過。豈爲晚乎。而奈何陰毒左計。一至於此。僕今已遭亂無家。扁舟短棹。借此身甚易。獨惜執事伎機一動。長伏草莽。則已。萬一復得志。必至殺盡天下。以酌其宿所不快。則是使天下士終不復至執事之門。而後世操簡書以議執事者。不能如僕之詞微而義婉也。僕且去。可以不言。然恐執事不察。

謂僕於長者傲。故敢述其區區。見壯梅堂文集卷末去
金陵日與阮光祿書

承示省訟。暫惡無所自容。執事與僕齒。不啻倍蓰。位不啻懸隔。願猥與僕道及少年之遊。謂執事往日曾以兼金三百。招致金陵伎。爲伎所却。僕實教之。而因以爬垢索癩。甚指議執事者。僕誠不自修飭。然竊恐重爲執事累也。使執事無可議。則昔賢如白太傅。歐陽公。東坡居士。皆與鳴珂不廢爵答。未聞後世之議之也。何獨至執事而苛求之。執事果有可議。卽不徵伎。庸但已乎。僕之來金陵也。太倉張西銘偶語僕曰。金陵有女伎李姓。能歌玉茗堂詞。尤落落有風調。僕因與相識。間作小詩贈之。未幾下第去。不復更與相見。後半歲。乃聞其却執事金。嘗竊歎異。自謂知此伎不盡。而又安從教之。且執事之邀之。在僕去金陵之後。今天下如執事者。不止一人。豈僕居常獨時。時標舉執事之姓名。預告此伎。謂異日或邀若。心不得往乎。此伎而無知也者。以執事三百金之厚賞。中丞之貴。方且奔命恐後。豈猶記憶一落拓書生之言。倘其有知。則以三百金之賞。中丞之貴。曾不能一動之。此其胸中。必自有說。而何待乎僕之告之也。士君子立身行己。自有本末。反復來示。益復汗下。僕雖書生。常恐一有蹉跌。將爲此伎所笑。而又能以生平讀數卷書。賦數首詩之伎。倆遂頤指而使之耶。惟執事垂察。不宜。見壯梅堂文集答田中丞書

仰即也

李香君

李姬者名香。母曰貞麗。貞麗有俠氣。嘗一夜博。輸千金立盡。所交接皆當世豪傑。尤與陽羨貞慧善也。姬爲其養女。亦俠而慧。略知書。能辨別士大夫賢否。張學士溥。夏吏部允彝。急稱之。少風調。皎爽不羣。十三歲。從吳人周如

松受歌玉茗堂四傳奇。皆能盡其音節。尤工琵琶詞。然不輕發也。雪苑侯生。己卯來金陵。與相識。姬嘗邀侯生爲詩。而自歌以償之。初皖人阮大鏡者。以阿附魏忠賢論城旦。屏居金陵。爲清議所斥。陽羨陳貞慧。貫池吳應箕。實首其事。持之力。大鏡不得已。欲侯生爲解之。乃假所善王將軍。日載酒食與侯生游。姬曰。王將軍貧。非結客者。公子盍叩之。侯生三問。將軍乃屏人述大鏡意。姬私語侯生曰。妾少從假母識陽羨君。其人有高義。聞吳君尤錚錚。今皆與公子善。奈何以阮公負至交乎。且以公子之世望。安事阮公。公子讀萬卷書。所見豈後於賤妾耶。侯生大呼稱善。醉而臥。王將軍者。殊怏怏。因辭去。不復通。未幾侯生下第。姬置酒桃葉渡。歌琵琶詞以送之。曰。公子才名文藻。雅不減中郎。中郎學不補行。今琵琶所傳詞固安。然嘗昵董卓。不可掩也。公子豪邁不羈。又失意。此去相見未可期。願終自愛。無忘妾所歌琵琶詞也。妾亦不復歌矣。侯生去後。而故開府田仰者。以金三百緡。邀姬一見。姬固却之。開府慚且怒。且有以中傷姬。姬歎曰。田公豈異於阮公乎。吾向之所贊於侯公子者。謂何。今乃利其金而赴之。是妾賣公子矣。卒不往。見侯朝宗壯健堂文集李姬傳

李香。身軀短小。膚理玉色。慧俊婉轉。調笑無雙。人題之爲香扇墜。余有詩贈之。云。生小傾城是李香。懷中婀娜袖中藏。何緣十二巫峯女。夢裏偏來見楚王。武塘魏子一爲書於粉壁。貴竹楊龍友寫崇蘭石於左偏。時人稱爲三絕。由是香之名盛於南曲。四方才士。爭一識面以爲榮。見板橋雜記

陳定生

陳貞慧字定生。宜興人。少保于庭第四子。見常州府志

往者天下多故。江左尙晏然。一時高門子弟才地自許者。陽羨陳定生。歸德侯朝宗。與辟疆爲三人。品覈執政。裁量公卿。雖甚強梗。不能有所屈撓者。有皖人者。流寓南中。故奄黨也。會三人者。置酒雞鳴埭。酒酣輒衆中大罵曰。若奄兒媚子。乃欲以詞家自贖乎。於是大恨次骨。申酉之亂。彼以攀附。驟榜用與大獄。以修舊怨。定生爲所得。幾填牢戶。朝宗遁之故鄣山中。南中人多爲辟疆耳目者。跳而免。具吳梅村冒辟疆壽序

陳郎者。余幼婿也。名宗石。字曰子萬。先是余與其父定生處士。同學金陵。又前則余祖與其祖少保公同年。同官御史。同論朱相廢李相廷機。而余父亦與少保公先後同朝。同救大司寇王紀。同爭紅丸。同忤魏璫忠賢。同削官。方余之與處士同學也。皖人阮大鍼者。有宿憾。後六年甲申。大鍼資緣。官兵部尙書。與黨人獄。或謂兩人盍曲謝皖人。余與定生笑不應。忽一日。緹校捕定生去。余倉皇出。兼金付錢君禧。代請問。而爲求緩於練司馬公。定生得免。乙酉春正月。有王御史者。阿大鍼意。上奏責浙直督府捕余。余時居定生舍。既就逮。定生爲經紀其家事。瀕行。送之舟中。而握余手曰。子此行如不測。故鄉又未定。此纍纍將安歸乎。吾家世與子之祖若父。暨子之身。無不同者。今豈可不同休戚哉。盍以君幼女妻我季子。余妻遂與陳夫人置杯酒定約去。是時余女方三歲。陳郎方二歲。爾其後解歸里。余居梁園。定生居陽羨。不相聞。又五年。定生寓書余曰。宗石已能讀書。解世事。甚念翁。未幾又寓書。復以爲言。余方侍老父疾。束裝罷者再。壬辰冬。始抵陽羨。與定生慰問畢。陳郎出揖。從容如成人。就坐。則雄談驚其坐客。余大喜。素不能飲酒。是日盡數卮。陳郎今年十歲。距余與定生別時。蓋八年矣。嗚乎。人生可惜。凡所謂百年者皆妄也。或以兵死。或以水火死。或以盜賊死。或以患難死。卽幸無是數者。而昔賢所謂七日不汗亦能死。

人然則人生壯且盛者。不過三四十年耳。而余與定生。忽忽已過其半。豈不痛哉。願向時欲殺吾兩人者。安在。而吾兩人猶各留面目相見。不可謂不幸也。因酒酣。撫陳郎背而告之曰。郎名宗石。字子萬。取萬石君之義也。郎之祖若父。皆爲世達人。有家法。諸昆羣從。奕奕競出。又畢萬之後必昌。吾以郎之祖若父卜之矣。然吾聞陳之姓。望惟太邱爲最。而昔人論之曰。公慙卿。卿慙長。今以處士之隱德。無慙少保。願即他日亦無慙處士可也。吾向見郎。郎在襦裋。今已能邁而向學。即使我每見必有所進。後其何慚之有。

見壯梅堂文集贈陳郎序

吳次尾

壬辰十月日。梁園侯方域。卽陽羨爲文。而三灑酒。祭於先友吳君次尾曰。嗚乎。次尾死矣。余早決次尾之死。而次尾果死矣。然余時時見吾次尾之面。冷而蒼。聳怒以張。言如風發。氣奪電光。坐於我上。立於我傍。狂醒酣醉時。一呼之。不知吾友之云亡也。今過陽羨。陳子來迎。憶我三人。共學石城。管更高歌。聲滿帝京。又同時而幾殺其身乎。大鍼與士英。蓋安樂與思難。固無一之弗并。今次尾竟不見。而獨見定生。嗚乎。次尾果死矣。因與定生痛哭失聲。君豈聞之耶。是夜卽夢君握余手。曲敘平生。歡笑異常。然則次尾又未必死也。余向聞君死。管就梁園爲位。南望而祭。然不欲爲文者。以未悉授命時本末。恐萬一亂真。失吾次尾。今定生乃爲我言。次尾戰敗。危坐正冠。徐起拜。故君辭先人。引頸就刃。意氣彌振。嗚乎。今而後吾次尾果死矣。次尾果死。次尾何慙。次尾果死。次尾固在。余與定生哭者。友朋之情。而次尾笑者。蓋夢中猶不屑爲兒女子之態。余與定生之於次尾。交親范張。一生一死。拜墓加封。當在君里。以君之神。乘雲策暑。今古蟬蛻。乾坤糠粃。方且無所不之。而又何必池陽之爲桑梓也。次尾念我與

定生別垂一紀。安知不已。駕池陽。過陽羨。格止觀止。特我與定生不能見爾。嗚乎。次尾讀萬卷書。識一字。是明三百年。獨養此士。見壯悔堂文集祭吳次尾文

吳公為太學生。嘗攻阮大鍼。與侯子素善。後大鍼得政。與黨人獄。必欲殺吳公及侯子。吳公語侯子曰。今有欲吾輩謝大鍼。可轉禍為福者。豈不為范滂所笑哉。會寧南侯稱兵。聲言清君側。而豫王師已逼。獄乃解。吳公歸。起兵戰敗。被執。就刑。語刑者曰。吾死勿去吾冠。將以見先朝於地下也。談笑而死。見四憶堂詩集註〇右哀吳次尾詩不錄

甲申為弘光元年。是時應箕與侯子同坐阮大鍼黨人獄。將逮之。此蓋應箕避難出金陵。而侯子送之也。見四憶堂詩集

賈靜子註〇右燕子磯送吳次尾詩不錄

楊龍友

貴竹楊龍友名文驄。以詩畫擅名。華亭董文敏亟賞之。甲申之變。貴陽馬士英冊立弘光。自為首輔。援引閹兒阮大鍼。搆黨煽權。擄亂天下。以致五月出奔。都城百姓。焚燒兩家居第。以龍友鄉戚有連。亦被烈焰。頃刻灰燼。龍友巡撫蘇松。盡室以行。後父子殉難。閩嶠無遺種也。猶存老母。丐歸金陵。依家僕以終天年。續板橋雜記

楊生個儼權奇者。萬里驍騰渥注馬。雙耳朝批貴竹雲。四蹄夕刷令支野。空坑師潰縉縉雲。流星飛兔不可還。即看汗血歸天上。青餘翰墨汚人間。人間翰墨已星散。十幅流傳六丁歎。披圖礪岫幾重掩。過眼煙嵐尙凌亂。楊生作畫師。巨然。隱囊紗帽如列仙。大兒聰明添樹石。侍女窈窕皺雲煙。一昔龍蛇起平陸。奮身拚施烏戩肉。已無丹燐并黃土。况乃牙籤與玉軸。趙郎癡棄湘峽新。摩挲看畫如寫真。每於剩粉殘縑裏。想見剗肝化碧人。趙郎趙郎

快收取。長將石壓并手撫。莫令匠近親身劍。夜半相將作風雨。見錢牧齋有學集
趙楊龍友畫冊

張瑤星

張怡字瑤星。初名鹿徵。上元人也。父可大。明季總兵登萊。會毛文龍將卒反。誘執巡撫孫元化。可大死之事。聞怡以諸生授錦衣衛千戶。甲申。流賊陷京師。遇賊將不屈械繫。將肆掠其黨。或義而逸之。久之。始歸故里。其妻已前死。獨身寄攝山僧舍。不入城市。鄉人稱白雲先生。當是時。三楚吳越耆舊。多立名義。以文術相高。惟吳中徐昭發。宣城沈眉生。躬畊窮鄉。雖賢士大夫不得一見其面。然尚有楮墨流傳人間。先生則躬樵汲。口不言詩書。學士詞人無所求取。四方冠蓋往來。日至茲山。而不知山中有是人也。先君子與余處士公佩。歲時問起居。入其室。架上書數十百卷。皆所著經說。及論述史事。請貳之。弗許。曰。吾以盡吾年耳。已市二壘。下棺則并藏焉。卒年八十有八。平生親故。夙市良材。爲具棺槨。疾將亟。聞而泣曰。昔先將軍致命危城。無親屬視含殮。雖改葬親身之裨。弗能易也。吾忍乎。顧視從孫某。趣易棺。定附身衾衣。乃卒。時先君子適歸皖桐。反則已渴葬矣。或曰書已入壙。或曰經說有二。尚存其家。乾隆三年。詔修三禮求遺書。其從孫某以書詣郡。太守命學官集諸生繕寫。久之未就。先生之書。余心嚮之。而懼其無傳也久矣。幸其家人自出之。而終不得一寓目焉。故并著於篇。俾鄉之後進。有所感發。守藏而傳布之。毋使遂沈沒也。見方望溪文集

張怡字瑤星。金陵遺民也。居棲霞一小庵。數十年不入城市。著書十餘種。有一書紀南渡時事。可裨史乘。惜未版行。凡所撰者。稱白雲自怡。年九十而終。四十年前游東萊時。先兄西樵亦客萊。相友善。及予在邗江。數客金陵。未

及見之。蓋已禁足攝山矣。予撰古權錄。亦遺此人。故著於此。見王賚上
香祖筆記

藍田叔

藍瑛字田叔。號蝶叟。錢塘人。山水法宋元諸家。晚乃自成一格。兼工人物花鳥梅竹。名盛於時。論者推爲浙派之
最見尙
友錄

史可法

史公燕京人。崇禎中爲戶部郎。與同官何楷倪嘉慶皆爲司徒公所拔。嘗曰三郎官皆君子。然史君功名後當過我。公感知己。事司徒公爲弟子。已而出爲安廬監司。進淮揚督撫。視漕皆有積用。甲申燕京之變。公爲南京兵部尙書掌機務。時弘光以福邸當承大統。倫序無可易者。公以強藩在外不卽決。乃就鳳陽總督馬士英謀之。而擁立功盡歸士英矣。士英尋引用阮大鍼。嫉公異己。出公以閣部督師淮揚。公忠誠清謹。嘗食蔬素。屢上疏抗陳。大恥未雪。廟堂不宜荒縱。天下誦之。然短於兵略。不能駕馭諸將。東平侯劉澤清。興平伯高傑。靖南侯黃得功。廣昌伯劉良佐。并建四藩。皆爲馬阮所用。傑後以疏救劉宗周鄭三俊等。觸馬阮怒。乃更歸心公。會經略中原至睢陽。爲許定國所殺。定國遂來降。導豫王兵南下。公守淮陽。諸將不肯戰。公嘆曰。事去矣。侯子避大鍼之難。在幕。公語之曰。南京固無可爲者。豈孝陵在天之靈。不能使將士一跨江背城耶。可法任兼將相。當死。子書生也。當去。倘見司徒公。幸爲謝生平知己。今庶無愧。城陷。公乘一白驪出。意以南京尙在。欲有所爲也。旣被執。公不屈死。徐曰。論者以史公無愧純臣。而用兵非其所長。故篇終以武侯信國斟酌許之。見四憶堂詩集賈靜子註
右哀史閣部詩不錄

左良玉

寧南侯者。姓左氏。名良玉。字曰崑山。遼東人也。少起軍校。以斬級功。官遼東都司。苦貧。嘗挾弓矢射生。一日見道旁駝。馳馬劫取之。乃錦州軍裝也。坐法當斬。適有邱磊者。與同犯。願獨任之。良玉得免死。既失官。久之無聊。乃走昌平軍門。求事司徒公。司徒公嘗役使之。命以行酒。冬至讎上陵朝官。良玉夜大醉。失四金卮。旦日謁司徒公。請罪。司徒公曰。若七尺軀。豈任典客哉。吾向誤若。非若罪也。會大凌河圍急。詔下昌平軍赴救。榆林人尤世威者。爲總兵官。入見司徒公曰。大凌河當天下勁兵處。圍不易解。世威當行。今旣以護陵不可。公且遣將。誰當往者。中軍將王國靖書生也。左右將軍。更不可任。司徒公曰。然則誰可。世威曰。獨左良玉可耳。願良玉方爲走卒。奈何。帥諸將。司徒公曰。良玉誠任此。吾獨不能重良玉乎。即夜遣世威前諭。漏下四鼓。司徒公竟自詣良玉。邸舍請焉。良玉初聞世威往。以爲捕之。繞床語曰。得非邱磊事露耶。走匿床下。世威排闥呼曰。左將軍富貴至矣。速命酒飲我。引出而諭以故。良玉失色戰慄。立移時乃定。跪世威前。世威且跪且掖起之。而司徒公至。乃面與期。詰旦會轅門。大集諸將。以金三千兩。送良玉行。賜之卮酒三。令箭一。曰。三卮酒者。以三軍屬將軍也。令箭如吾自行。諸將士勉聽左將軍命。左將軍今已爲副將軍。位諸將上。吾拜官疏。夜即發矣。良玉既出。而以首叩轅門。墀下曰。此行倘不建功。當自刎其頭。已而果連戰松山杏山下。錄捷功第一。遂爲總兵官。良玉自起譎校。至總兵。首尾僅一餘年。三十二。是時秦寇入豫。良玉當往勦。見司徒公。司徒公曰。將軍建大功。殊不負我。欲有言以贈將軍。將軍奚字。良玉曰。無也。司徒公笑曰。豈有大將軍終身稱名者哉。良玉拜以爲請。司徒公曰。卽崑山可矣。自此乃號爲崑山將。

軍。良玉長身頰面。驍勇善爲左右射。每戰身先士卒。旣至豫。則向所苦賊帥一斗。穀。蝎子塊。滿天星等。皆平。最後戰懷慶。與督府意不合。乃嘆曰。吾卽盡賊。安所見功乎。遂陰縱之。而寇患始大。熊文燦者。繼爲督府。皆受賊金而脫其圍。良玉猶輕之。以至楊嗣昌以閣部出視師。倚良玉不啻左右手。九調而九不至。嗣昌怏怏死。丁啟睿代督師。則往來依違於其間。爲良玉調遣文書。未始自出一令。時人謂之左府幕客。當良玉立功最早。威名重一時。強兵勁馬。皆在部下。流賊憚之。呼爲左爺爺。壬午大出兵。與李自成戰朱仙鎮。三日夜而敗。良玉還軍襄陽。初良玉三過商邱。必令其下曰。吾恩府家在此。敢有擾及草木者。斬。入城謁太常公。拜伏如家人。不敢居於客將。朝廷知之。乃以司徒公代丁啟睿督師。良玉大喜。踴躍遣其將金聲桓率兵五千迎司徒公。司徒公旣受命。而朝廷中變。乃命距河援汴。無赴良玉軍。良玉欲率其軍三十萬。覲司徒公於河北。司徒公知糧無所出。乃諭之曰。將軍兵以三十萬稱盛。然止四萬在額受糧。實又未給度支。今遠來就我。固善。第散其衆則不可。若悉以來。而自謀食。咫尺幾轉。將安求之。卒不得與良玉軍會。未幾有媒孽之者。司徒公遂得罪。以呂大器代。良玉慍曰。朝廷若早用司徒公。良玉敢不盡死。今又罪司徒公而以呂公代。是疑我而欲圖之也。自此意益離。遂往來江楚爲自堅計。盡取諸鹽船之在江者。而掠其財。賊帥惠登相等皆附之。軍益強。又嘗稱軍饑。欲道南京就食。移兵九江。兵部尙書熊明遇大恐。請於司徒公。以書諭之而止。朝廷不得已。更欲爲調和計。封良玉爲寧南侯。而以其子夢庚爲總兵官。良玉卒不爲用。燕京陷。江南立弘光帝。馬士英阮大鍼亂啟。良玉乃與兵清君側。欲廢弘光帝。立楚世子。至九江病死。而英王師尾其後。夢庚以其身降。初尤世威爲總兵時。往謁薊遼督府曹文衡。文衡尊嚴不少假。更謁司徒公。

司徒公諭勿令長跪。相見如弟子禮。世威感悅。願効死。司徒公行邊至黃花鎮上。遇火砲。司徒公歷於敵樓下。背上積二十二死人。世威震而有五里外。起立卒不肯去。號而呼。求司徒公。復至敵樓。適有電光照司徒公。世威乃趨而抱之。而以手起其二十二死人者。火及冠脫其冠。及袍脫其袍。遂燒其鬚。及其左耳。世威堅不動。竟袒而負司徒公。以出行四十里。抵於山下。邊人謂之尤半耳云。邱磊者既坐斬。繫刑部獄十三年。良玉每一歲捐萬金救之。得不死。卒受知司徒公。後爲山東總兵官。

侯方域曰。余少時見左將軍。將軍自不知書。然性通曉解文義。勇略亞於黔彭。而功名不終何歟。當左將軍出軍時。有黨應春者。以軍校逃伍當死。司徒公縛而笞之。百。應春起而徐行。無異平時。披以爲軍官。復逃再縛之。來應春仰首曰。節官實豈異軍校耶。司徒公異之。以付左將軍爲先鋒。後乃立功佩印。爲山海關將。然則將苟有材。得其人以御之。雖卒伍可也。而況於公侯哉。見壯悔堂文集

寧南左侯良玉也。按崇禎三年。以侯子父司徒公爲兵部侍郎。督軍昌平。良玉隸麾下爲裨將。司徒公識拔之。已而良玉積軍功爲諸道平賊元帥。十六年封寧南侯。以太傅開藩武昌。先是寇陷河南南陽歸德。圍開封。諸道兵皆敗。良玉還軍襄陽。朝廷以良玉與司徒有部曲誼。乃罷兵部尚書兼秦蜀晉豫楚鳳皖諸道督府。丁啟睿客兵保定督府楊文岳。以司徒統良玉等七鎮代之。趣解汴圍。司徒奏朝廷曰。寇患積十五年而始大。非可一朝圍也。由秦入豫。一敗汪喬年。再敗傅宗龍。而天下之強兵勁馬。皆爲賊有矣。賊騎數萬爲一隊。飄忽若風雨。過無堅城。因資於我。官軍但尾其後。問所向而已。卒或及之。馬墮士餓。甚且以賜劍之靈。不能使閉城之縣令。出門一見。運一

策。獨饋一斛米。此所以往往挫敗也。今賊氛告迫。全豫已陷其七八。藩王待救。望若雲霓。然自他日言之。中原爲天下腹心。自今日言之。乃糜破之區耳。自藩王言之。維城固重。自天下安危大計言之。則維城當不急於社稷。臣爲諸道統帥。身任平賊。豈可言舍汴不援。但臣所統七鎮。合之不過數萬人。而四鎮尙未到也。馮河而前。無論輕身非長子之義。亦使羣賊望之。測其虛實。玩易朝廷矣。賊中情形。臣已具悉。大約饑則聚掠。飽則棄餘。已困之糧。不積積。地生之利。未聞屯種。且多久遠思歸。中宵雨泣。以乘積強。難驟櫻其鋒。然其強易散。可持久而定也。賊中聯營各部。如曹操一支。窺李自成。有兼并之心。陰相猜貳。而袁時中有步卒二三十萬。則已去而顯與爲敵矣。惟是彼之情實。難以猝與我通。而當事秉鉞者。避款賊之嫌。又皆畏首畏尾。不肯一擔當利害。爲國遠圖。以致機會之來。覲面坐失。此卽朝更一撫。夕易一督。而省臺言兵事之臣。章疏日數十。豈能鑄銖有濟哉。誠能省朝中議論。行闔外軍法。不徇人情。厚集兵力。養成蓄重。伺隙設間。潰其腹心。賊必變自內生。惟在任事之人。肯捐去形迹。一捨其身與否。而陛下聽之斷與不斷。任之力與不力耳。故爲今計。苟有確見。莫若以河南委之。令保定撫臣楊進。山東撫臣王永吉。北護河。鳳陽撫臣馬士英。淮徐撫臣史可法。南邊賊衝。而以秦陝督臣孫傳庭塞潼關。臣率左良玉固荊襄。凡此所以斷其奔佚之路也。臣鄉自賊中來者。皆言百萬。今且以人五十萬。馬十萬。計人食日一升。合馬食日三升。則是所至之處。日得八千鍾粟也。中原赤地千里。望絕人煙。自茲以往。安所致此哉。目今兵強無過良玉。良玉爲臣舊部。每對臣使。涕泣有報効之心。三過臣里。皆向臣老父叩頭。不敢擾及草木。私恩如此。豈肯負國。但從前督輔。駕馭取方。兼之兵多食寡。調遣爲難。誠使臣得馳赴其軍。宣諭將士。鼓以忠

養用三楚之糧。養全鎮之兵。臣不就度支關餉。陛下不必下軍令狀。責取戰期。機有可乘。卽東出與孫傳庭合。羣賊背腹驚擾。駭突無所。不相屠滅。必自降散。舍此不圖。而欲急已潰之中原。失可扼之險要。蛇豕薦食。恐其禍有不止於藩王者。此社稷之憂。而非小小成敗之計也。奏入。朝廷不許。見四憶堂詩集賈辭子註。右寄寧南侯詩不錄。

時良玉進寧南侯。朝廷乃以夢庚爲總兵。佩平賊印綬代之。見同上。右寧南侯詩不錄。

崇禎十六年。以左良玉鎮荊襄。是歲良玉以糧盡引兵東下。欲趨金陵。都人驚竄。太諸生以侯子與良玉有世舊。誼言之。司馬熊明遇請致書上之。侯子與良玉書。略曰。將軍今日功高望厚。猶唐之有郭子儀李光弼也。子儀每承王命。徇僕而走。光弼後稍蹉跎。乃至偏較不相稟。良雖固同始。究復異終。此無他。勳地既盛。妒口先之。形迹之際。昭白宜蚤。將軍疆場之臣。未奉進止。奈何欲謁孝陵。弓劍哉。且朝廷所以重將軍者。謂能節制經緯。危不異於安也。荆襄上千里。自可具食。豈謂小飢動至。同諸軍士倉皇耶。良玉得書而止。見同上。右九日雨花台詩不錄。

左良玉字崑山。臨清人。少從軍。以功至遼東都司。長身頰面。善左右射。以驍勇聞。嘗與丘磊同坐法當斬。丘請以身獨任。良玉得免。死去。事昌平督治侍郎侯恂。凌河圍急。有詔調昌平軍赴援。總兵尤世威以護陵不得行。恂謀可將者。世威曰。無如左良玉。卽夜遣世威諭意。良玉聞世威至。大懼。以爲將捕已也。曰。得毋丘磊事發乎。匿床下。世威直前引之出。曰。君無恐。富貴至矣。告以故。良玉錯愕。跪。世威亦跪。掖之起。恂繼至。相與參語。爲定詰朝大集。諸將於轅門。以三千金送良玉行。賜以卮酒三。令箭一。曰。酒三卮者。以三軍屬將軍也。令箭如我自行。爾位諸將上。軍士其聽左將軍之命。毋忽。良玉出。以首觸轅門。誓以死報。已而戰捷有功。實授總兵官。自後良玉蕩寇剿賊。

力矢報國無他心。在懷慶與督撫議不合。始圖緩追。養寇收降者以自重。張獻忠之畏良玉也。始於南陽之役。獻忠嘗駐兵南陽之東關。僞稱官軍。以詐圖取皖城。門未啟而良玉兵適至。前驅訶問爲誰。獻忠倉皇走。良玉同副將羅僂追射之。矢着其額。又射貫其左手中。指於弓檠上。馬尾相啣。良玉抽刀揚削。拂獻忠之面。創未深。比再下而馬已逸矣。崇禎十二年。獻忠焚穀。躡房。竄入鄆竹山中。羅汝才九營並起。應之。汝才者即賊中所謂曹操也。與獻忠同時起。熊文燦欲追之。良玉不可。曰。箬簿深阻。前逃後伏。彼非絕地也。二叛九營同惡氣。彼非窮竄也。我師負米入山。顛顛厓谷。十日糧盡。馬疲士飢。不敗而何。文燦不從。七月。良玉追至房縣。賊設伏羅荻山。果敗。積事聞於朝。良玉具條前後與理臣爭者上之。中樞陽嗣昌諱言文燦失策。又知過不在左。故於其督師也。特表良玉爲平賊將軍。俾刷孟明曹沫之耻。十三年閏正月。嗣昌檄諸道進兵。良玉於二十四日合諸軍擊賊於拘秤關。獻忠敗走。我師追之於蜀。嗣昌欲良玉駐軍興平。別遣偏師追勦。移檄良玉曰。將軍今從漢陽西鄉入川。萬一賊從舊路折回。疾趨平利。仍入竹房。將用何兵禦之。不則走寧昌以入歸巫。與曹操合。我以大將尾追。趨賊入楚。非策也。良玉報曰。逆獻被創入川。則有糧可因。回鄖則無地堪掠。非萬分窘急。必不復竄楚境。鄭嘉棟前報折回吉家莊者。此悍子手。乃老獍獨一斗粟之殘賊。嘉棟誤以爲獻耳。二月朔。良玉引兵竟趨大竹。監軍萬元吉深以進退自主。不相稟承爲言。嗣昌曰。良玉書詞慷慨。惟敵是求。宜降心曲從之。於時獻忠營太平縣之大竹河。良玉駐軍滄溪渡。秦督鄭崇儉亦引兵來會。獻忠移營九滾坪。見瑪瑙山峻險。據之以決勝。左兵秦兵以初四日至九滾坪。不見賊。初七日始抵瑪瑙山。賊方乘高鼓噪。良玉下馬。披荆榛。周覽久之。曰。我知所以破敵矣。分兵爲三。左當其

二。秦當其一。令賀人龍李國安二將從左路夾擊賊。置陣堅不可動。我師奮勇戰。賊潰。遂北四十餘里。左兵斬首二千二百八十有七。秦兵斬首一千三百三十有三。降賊將三十五人。是役也。良玉功第一人。龍功次之。然實成於嗣昌之委曲信從。俾良玉機宜自便。故卒取全勝焉。良玉破獻忠。勢張甚。收其士馬大半。分所部爲三十六營。營一副將主之。軍勢幾與李自成相埒。十五年。自成復圍開封。上出故尙書侯恂於獄。以兵部侍郎代丁啟濬爲師。上意蓋欲借恂之舊恩以用良玉。不料恂未至。而良玉已敗於朱仙鎮矣。左之在朱仙鎮也。賊營於西。我軍營於北。大雨數日。良玉夜集諸將計事。至辨色猶未散。隱隱見營南有山若雲者。衆愕視。左舉刀掣地曰。噫。此必瞎眼築土山。立礮臺打我矣。探之信然。左命中軍亦立臺應之。賊更番迭休不能支。乃拔營去。自成曰。左健將此來必死鬪。慎無與戰。俟其佚而襲之可也。先穿巨壘於前。深廣各二尋。環而繞者幾百里。左兵戰且走。自成率百萬衆遮其後擊之。軍亂倉卒渡溝。賊從而蹂躪之。遂大敗。恂至軍。上命距河圖賊。令良玉以兵來會。良玉新敗。無意北行。遣將金聲桓以五千人從。久之。汴亡。上怒恂罷其官。以呂大器代恂。解任至中途。卽被逮下獄。左知其以己故得罪。有快快心。每事與大器齟齬。時良玉墜於樊城。大造戰艦。賊將惠登相常國安馬進忠馬士秀杜應金吳學禮皆附之。士卒滋衆。然親軍愛將強半死亡。降人多不奉約束。良玉氣漸衰多病。不復能與自成戰矣。自成破汴後。謀據襄陽。乘勝攻左。左引舟師。左步右騎而下武昌。全軍南潰。所過殺掠。鱗鱗隱天。江流中斷。留都文武大吏驚愕無策。李公邦華時拜北掌院。道出湖口。聞警草檄告良玉。以大義責之。又用其親信李猶龍胡以寧輩。開陳曉暢。許以力爲保全功名。釋中山箱篋之疑。專元侯弓矢之寄。飛書皖撫。發九江庫銀十五萬。補六月糧。良玉

感泣。具囊韃禮謁李公。公辭之。引見慰勞甚至。軍心大定。南都始解嚴。良玉息肩於皖。八月至武昌。立軍府。以旗招百姓。軍船所掠下江貨物賤其估。以通市。遣將次第收袁岳。而江西湖南略定。十七年正月。上封良玉爲寧南伯。賜其子夢庚平賊將軍印。俾功成後世守武昌。仍下特詔催戰。良玉乃條日月進兵狀。爲疏以聞。時道路梗塞。騎置稽緩。疏入未報。而北都陷賊之信至矣。寧南聞先帝升遐。卒。三軍縞素發喪。繼而南中立君。五月甲辰。詔以寧南伯進爵爲侯。蔭一子錦衣衛正千戶。自成新敗於關門。楚西境稍可乘。寧南以其間復荊州德安承天。何騰蛟爲楚撫。袁繼威爲江督。共以忠義相勸勉。時左兵八十萬。號百萬。前營爲親軍。後營爲降軍。諸將頗驕玩。營中歌舞達旦。寧南既老而被病。惟塊然一榻。柳生敬亭者。善談笑。軍中呼爲柳麻子。搖頭掉舌。談諧雜出。每夕張燈高坐。談說隋唐間遺事。寧南親信之。出入臥內。未嘗頃刻離也。乙酉四月初二日。傳檄討馬士英。至九江。袁繼威相見於舟中。別去。城中卽火起。寧南見火光。知城破。椎胸浩歎曰。予負袁公。時病已革。嘔血數聲而卒。初丘磊坐斬。繫刑部獄。十三年。良玉歲捐萬金救之。得不死。侯恂之再爲督師也。奏以爲山東總兵。與劉澤清不相得。搆以罪。甲申十一月丁酉。馬阮命撫臣田仰斃之於淮南獄中。或曰良玉東下。蓋亦因磊死故。見錢牧齋學集詩註

頃待罪師中。每接音徽。嘉壯志。又未嘗不歎以將軍之材武。所向無前。而犄角無人。卒至一簣遺恨。今凶焰復張。墮壞名城。不下十數。飛揚跋扈。益非昔比。雖然。天厚其毒。於斯極矣。非常之功。必待非常之人。一時闔外士銳。馬騰。有如將軍者乎。忠義威略。有如將軍者乎。久於行陣。熟悉情狀。有如將軍者乎。然則今日所稱爲熊羆不二心者。舍將軍其誰。老夫彘者。倉卒拜命。固以主憂臣辱。金革之義。不敢控辭。亦緣與將軍知契素深。相須如左右手。

倘得憑先聲。殲渠俘馘。實千載一時。不謂六年患難。病疾已篤。更遭家變。痛毀之過。遂致廢廢。爰以采薪之憂。未畢盡瘁。顧念高厚。末繇報塞。惟願將軍。賈其餘勇。滅此朝食。是則十五年舊部。所以不忘老夫。而老夫藉手以答萬一。猶之其身耳矣。勉旃勉旃。鄉土喪亂。已無寧宇。將寄白下。喘息未蘇。風鶴頻警。相傳謂將軍駐節江州。且揚帆而前。老夫以爲必不然。卽陪京卿大夫亦共信之。而無如市井倉皇。詛以滋訛。幾於三人成虎。夫江州三楚要害。麾下汎防之衝也。郢襄不戒。賊勢鴟張。時有未利。或需左次。以驕之。儲威風。俾圖收復。在將軍必有確畫。過此一步。便非分壤。冒嫌疑。義何居焉。若云部曲就糧。非出本願。則尤不可。朝廷所以重將軍者。以能節制經緯。危不異於安也。荆土千里。自可具食。豈謂小饑動至。同諸軍士倉皇耶。甚則無識之人。料麾下自率前驅。伴送室帑。匈奴未滅。何以家爲。生平審處。豈後剽姚。或者以垂白在堂。此自網紀奉移內郡。何必雙旌。聿來相宅。況陪京高皇帝弓劍所懸。禁地肅清。將軍疆場師武。未取進止。詎宜展觀。語云。流言止於智者。若將軍今日之事。其爲流言。又不待智者而決之矣。惟是老夫與將軍。義則故人。情實一家。每聞將軍奏凱獻捷。報效朝廷。則喜動顏色。傾耳而聽。引席而前。惟恐其言之盡也。或功高而不見諒。道路之口。發爲無稽。則輒掩耳而走。避席而去。嗟乎其不願聞也。頃者浪語最堪駭異。雖知其妄。必以相告。將軍十年建豎。中外倚賴。所當矜重。以副人望。郭汾陽功蓋天下。勢極一時。而國體所關。呼之未嘗不來。遣之未嘗不去。當其去來。若不自知其大將也。同時臨淮亦與齊名。其後勢位之際。稍不能忘。偃蹇蹉跎。乃至偏較不復稟承。此無他。功名愈盛。責備益深。善處形迹。昭白宜早。惟三思留意焉。不盡。見壯梅堂文集爲司徒公與梅南侯書

竊見逆賊馬士英。出自苗種。性本兇頑。臣身在行間。無日不聞其罪狀。先帝皇太子至京。道路洵傳。陛下屢發於慈。士英以真爲假。必欲置之死而後快。臣前兩疏。望陛下從容審處。猶冀士英剔腸悔過。以存先帝一線。不意奸謀日甚。一日。臣自此義不與奸賊共天日矣。臣已提師在途。將士眦目指髮。必欲快食其肉。臣且聲其罪狀。正告陛下。仰祈剛斷。與天下共棄之。自先帝之變。人人號泣。士英利災擅權。事事與先帝爲難。欽案先帝手定者。士英首翻之。要典先帝手焚者。士英修復之。思宗改謚。明示先帝不足思。以絕天下報仇雪恥之心。罪不容於死者一也。國家提衡文武。全恃名器。鼓舞人心。自賊臣竊柄以來。賣官鬻爵。殆無虛刻。都門有職方賤如狗。都督滿街走之。搖如越其傑。以貪罪遣戍。不一年而立升部堂。張孫捷以賊污狡犯。不數月而竄綠僕。袁洪勳與張道潛。皆詔獄論罪者也。借起廢復原官。楊文驄。劉泌。王燧。黃鼎。趙書辦等。行同犬彘。罪等叛逆。皆用之於當路。凡此之類。直以千計。罪不容於死者二也。閣臣司票擬。政事歸六部。至於兵柄。尤不得兼握。士英已爲首輔。猶復掌樞。是弁髦太祖法度。且引其心腹阮大鍼。爲添設尙書。以濟其篡弒之謀。兩子鼻窺。各操重兵。以爲呼應。罪不容於死者三也。陛下選立中宮。典禮攸關。士英先擇其尤者。以充下陳。又私買歌女。寄養阮大鍼家。希圖進選。計亂中宮。罪不容於死者四也。陛下卽位之初。恭儉神明。士英百計誑惑。進優童豔女。損傷盛德。每對人言。惡則歸君。罪不容於死者五也。國家遭此大難。須寬仁慈愛。以收人心。士英自引用阮大鍼以來。睚眦殺人。如雷縝祚。周鏞等。煨燼周內。株連蔓引。尤其甚者。借題三案。深埋陷阱。將生平不快意之人。一網打盡。罪不容於死者六也。九重秘密。豈臣子所敢言。士英徧布私人。凡陛下一言一動。無不窺視。又募死士。竄伏皇城。詭名禁軍。以觀陛下動靜。曰廢立

由我。罪不容於死者七也。率土碎心痛號者。先帝殉難。皇子猶存。前此定王之事。海內至今傳疑未已。況今皇太子授受分明。臣前疏已悉。士英乃與阮大鍼一手拿定。不畏天道神明。不畏二祖列宗。不畏天下公議。不畏萬古綱常。忍以先帝已立七年之嗣君。付之幽囚。天昏地慘。神人共憤。凡有氣血。皆欲寸磔大鍼士英等。以謝先帝。此非臣之私言。天下忠臣義士。愚夫愚婦之公言也。伏乞陛下立將士英等。肆諸市朝。傳首四方。用抒公憤。臣等束手計刻以待。見鄒濟明李遣
聞討馬阮疏

蓋聞大義之垂。炳於星日。無禮之逐。嚴於鷹鷂。天地有至公。臣不可罔也。奸臣馬士英。根原赤身。種類藍面。昔冒九死之罪。業已僑妾作奴。屠髮爲僧。重荷三代之恩。陡爾狐窟白門。狼吞泗上。會當國家多難之日。侈言擁戴。勸進之功。以今上曆數之歸。爲私家攜贈之物。竊弄威福。遏蔽聰明。持兵力以脅人。致天子閉目拱手。張僞旨以襲俗。俾兵民重足寒心。本爲報仇而立君。乃事事與先帝爲仇。不祇矯誣聖德。初因民願而擇主。乃事事拂兆民之願。何由奠麗羣生。幻屨蔽天。妖孽障日。賣官必先姻婭。試看七十老囚。三木敗類。居然節鉞。監軍漁色。罔識君親。託言六宮備選。二八紅顏。變爲桑間濮上。蘇松常鎮。橫征之使肆行。樽李會稽。妙選之音日下。江南無夜安之枕。言馬家便爾殺人。北斗有朝彗之星。謂英名實應圖讖。除誥封贈。餘無朝政。自私怨奮。仇而外無功能。類此之爲。何其亟也。而乃冰山發嶽。鱷水與波。羣小充斥於朝端。賢良竄逐於匡谷。同己者性侔豺虎。行列豬猡。如阮大鍼。楊維垣。越其傑。等數十巨惡。皆引之爲羽翼。以張殺人媚人之赤幟。異己者德並蘇黃。才媿房杜。如劉宗周。姜曰廣。高宏圖。輩數十大賢。皆注之爲朋黨。以快虺如蛇如之狠心。道路有口。空憐職方如狗。都督滿街之謠。神

明難欺。最痛立君由我。殺人何妨之句。嗚呼。江漢長流。瀟湘罄竹。盡此之罪。豈其極與。若鮑魚菴而日羶。火木重而愈烈。放崔魏之瘦狗。遽敢滅倫。收闖獻之獼猴。敢以升木。用腹心出鎮。太尉朱泚之故智。幾幾殆有甚焉。募死士入宮。字文化及之所爲。人人而知之矣。是誠河山爲之削色。日月俟以無光。又況皇嗣幽囚。列祖怨恫。海內懷忠之臣。誰不願食其肉。敵國向風之士。咸思操盾其家。本藩先帝舊臣。招討重任頻年。痛心疾首。願爲鼎邊雞犬以相從。此日履地戴天。誓與君側豺狼而并命。在昔陶八州靖石頭之難。大義於今炳然。迨乎韓蘄王除苗氏之奸。臣職如斯。乃盡是用礪兵秣馬。討罪與師。當鄭敗討賊之軍。憶裴度閉邪之語。謂朝中奸黨盡去。則諸賊不討自平。倘左右兇惡未除。則河北雖平無用。三軍之士。戮力同仇。申明仁義之聲聞。首嚴焚戮之隱禍。不敢妄殺一人。以傷天心。不敢荒忽一日。以忘王室。義旗所指。正明爲人臣子。不忘君父之心。天意中興。必有間世英豪。矢翊皇明之運。泣告先帝。揭此心肝。願斬賊臣之首。以復九京。還收阮奴之黨。以報四望。倘惑於邪說。誣謬流言。或受奸臣之指揮。或樹義兵之仇敵。本藩一腔熱血。鬱爲輪困離奇。勢必百萬雄兵。化作蛟螭妖孽。玉石俱焚之禍。近在目前。水火無情之時。追維心痛。敬布苦衷。願言共事。嗚呼。朝無直臣。誰斥李林甫之邪奸。國有同心。尙懷鄭虎臣之素志。我祖宗三百年養士之德。豈其決裂於僉壬。大明朝十五國忠義之心。正宜暴白於魂魄。速張瘡虎之機。勿作捕猿之藪。燃董卓之腹。膏溢三旬。籍元載之廚。椒盈八百。國人盡快。中外甘心。謹檄。見鄭濟明學遠聞討馬阮檄

柳敬亭

柳敬亭者。揚之泰州人。蓋曹姓。年十五。癡悍無賴。名已在捕中。走之盱眙。困甚。挾稗官一冊。非所習也。耳剽人。妄

以其意。抵掌盱眙市。則已傾其市人好博。所得亦綠手盡。有老人日爲釀百錢。從寄食久之。過江。休大柳下。生攀條。恣然已。撫其樹。願同行數十人曰。嘻。吾今氏柳矣。聞者以生多端。或大笑以去。後二十年金陵有善談論柳生衣冠懷之。輻輳門車常接轂。所到坐中皆驚。有識之者。此固嚮年過江時。休樹下者也。柳生之技。其先後江湖間者。廣陵張樵陳思。姑蘇吳逸。與柳生四人者。各名其家。柳生獨以能著。或問生何師。生曰。吾無師也。吾之師乃儒者。雲間莫君後光。莫君之言曰。夫演義雖小技。其以辨性情。考方俗。形容萬類。不與儒者異道。故取之欲其肆。中之欲其微。促而赴之欲其迅。舒而釋之欲其安。進而止之欲其留。整而歸之欲其潔。非天下至精者。其孰與於斯矣。柳生迺退就舍。養氣定詞。審音辨物。以爲揣摩。期月而後請莫君。莫君曰。子之說末也。聞子說者。驩哈嗔。是得子之易也。又期月曰。子之說幾矣。聞子說者。危坐變色。毛髮盡悚。舌僑然不能下。又期月。莫君望見驚起曰。子得之矣。目之所視。手之所倚。足之所跂。言未發而哀樂俱乎其前。此說之全矣。於是聽者儼然若有見焉。其竟也。恤然若有亡焉。莫君曰。雖以行天下莫能難也。已而柳生辭去之揚州。之杭之吳。吳最久之金陵。所至與其豪長者相結。人人暱就生。其處己也。雖甚卑賤。必折節下之。卽通顯。教弄無所語。與人談。初不甚諧謔。徐舉一往事相酬答。澹辭雅對。一座傾靡。諸公以此重之。亦不盡以其技強也。當是時。士大夫避寇南下。僑金陵者萬家。大司馬吳橋范公。以本兵開府。名好士。相國何文端。園門避造。請兩家引生爲上客。客有謂生者曰。方海內無事。生所談皆豪猾大俠草澤亡命。吾等聞之。笑謂必無是。乃公故善譏耳。孰圖今日不幸竟親見之乎。生聞其語。慨然。屬與吳人張燕筑沈公憲俱。張沈以歌。生以談。三人者。酒酣。悲吟擊節。意悽愴傷懷。凡北人流離在南者。聞之無不流。

涕未幾而有左兵之事。左兵者。寧南伯良玉軍譟而南。尋奉詔守楚。駐皖城待發。守皖者。杜將軍宏域。於生爲故人。寧南嘗奏酒。思得一異客。杜旣已洩之矣。會兩人用軍。事不相中。念非生莫可解者。乃檄生至。進之。左以爲此天下辨士。欲以觀其能。帳下用長刀遮客。引就席。坐客咸振摺失次。生拜訖。索酒。談調諧笑。旁若無人者。左大驚。自以爲得生晚也。居數日。左沉吟不樂。熟視生曰。生揣我何念。生曰。得母以亡卒入皖。而杜將軍不法治之乎。左曰。然。生曰。此非有君侯令。杜將軍不敢以專也。生請銜命矣。馳一騎。入杜將軍軍中。斬數人。乃定。左幕府多儒士。所爲文檄。不甚中窾會。生故不知書。口畫便宜。輒合。左起卒伍。少孤貧。與母相失。請馳封不能得其姓。洎承睫不止。生曰。君侯不聞天子賜姓事乎。此吾說書中故實也。大喜。立具奏。左武人。卽以爲知古今。識大體矣。阮司馬懷寧。生舊識也。與左鄰。而新用事。生還南中。請左曰。見阮元何。左無文書。卽令口報阮。以捐棄故嫌。圖國事於司馬也。生歸對如寧南指。且約結還報。及聞叛。礮築城。則頓足曰。此示西備疑必起矣。後果如其慮焉。左喪過龍江關。生視笑曰。有迎且拜。拜不肯起者。則其愛將陳秀也。秀嘗有急。生活之。具爲予言救秀狀。始左病。恚怒。而秀所犯重。且必死。生莫得椿楮。乃設之以事曰。今日飲酒不樂。君侯有奇物玩好。請一觀可乎。左曰。甚善。出所畫己像。二其一。關隴破賊圖也。覽鏡自照。歎曰。良玉天下健兒也。而今衰。指其次曰。吾破賊後。將入山。此圖所以志也。見納而杖者。數童子從。其負瓢笠且近。則秀也。生佯不省。而徐睨爲誰。左語之。且告其罪。生曰。若負恩當死。願君侯以親信卽入山。且令相從。而殺之。卽此圖爲不全矣。左頷之。其善用權譎。爲人排患解紛。率類此。初生從武昌歸。以客將新道軍所來。朝貴皆傾動。願自安舊節。起居故人無所改。逮江上之變。生所携及留軍中者。亡散累千金。再

貧困而意氣自如。或問之曰。吾在盱眙市上時。夜寒藉束藁臥。屣履踵決。行雨雪中。竊不自料。以至於此。今雖復落尙足爲生。且有吾技在。寧渠愛貧乎。迺復來吳中。每被酒。嘗爲人說故寧南時事。則歎歔灑泣。既在軍中久。其所談益習而無聊。不平之氣無所用。益發之於書。故晚節尤進云。舊史氏曰。予從金陵識柳生。同時有楊生季衢。故醫也。亦客於左。奏攝武昌守。拜爲眞。左因強柳生以官。笑弗就也。楊今去官。仍故業。在南中。亦縱橫士。與予善。

見梅村文集

柳敬亭泰州人。本姓曹。避仇流落江湖。休於樹下。乃姓柳。善說書。遊於金陵。吳橋范司馬。桐城何相國。引爲上客。常往來。南曲與張燕筑沈公憲俱。張沈以歌曲敬亭以談辭。酒酣以往。擊節悲吟。傾靡四座。蓋優孟東方曼倩之流也。後入左寧南幕府。出入兵間。寧南亡。敗。又遊松江。馬提督軍中。鬱鬱不得志。年已八十餘矣。間過余僑寓宜

睡軒中。猶說秦叔寶見姑娘也。見板橋雜記

何人踞坐戎帳中。寧南徹侯崑山公。手指揮彈出獅象。鼻息呼吸成虎熊。帳前接席柳麻子。海內說書妙無比。長揖能令漢祖驚。搖頭不道楚相死。是時寧南大出師。江湖千里連軍麾。每當按甲林兵日。更植椎牛饗士時。夜營不啻角聲止。高座張燈拂筵几。吹唇芒角生燭花。掉舌波瀾沸江水。寧南聞之鬚鬚張。飲飛檣馬俱騰驤。誓剗心肝奉天子。拚酒毫毛布戰場。秦灰燒殘漢幟靡。嗚呼寧南長已矣。時來將師長頭角。運去英雄喪首尾。倚天劍老親身匣。垂斃猶與晉陽甲。數升赤血噴餘皇。萬斛青蠅掩墻雲。白衣殘客哭江天。畫像提携訴九泉。舌端有鐔腸堪斷。泣下無珠血可憐。柳生柳生吾語爾。欲報恩門仗牙齒。憑將玉帳三年事。編作金陀一家史。此時笑隳比傳

奇。他日應同汗竹垂。從來百戰青磷血。不博三條紅燭詞。千載沈埋國史傳。院本彈詞萬人羨。盲翁負鼓趙家莊。
寧南重爲開生面。見錢牧齋有學集左寧南畫像爲柳敬亭作

丁繼之

錢牧齋壽丁繼之七十初度四首云。左右風懷寄暮年。花枝酒海鏡臺前。每憑青鳥傳書信。不欠黃姑下聘錢。無事皺眉常自慰。有人擁髻正相憐。笑他丁令千年後。化鶴歸來勸學仙。其二云。龍漢分明規外年。清淮流水水赤欄。前。琴尊自可爲三友。花月何曾費一錢。留客恰宜邀笛步。當歌最愛想夫憐。案頭老蠹休相笑。食字春蟲豈作仙。其三云。曲蹄橫奔敵少年。金丸玉勒萬人前。淳于正合傾三斗。程尉何曾直一錢。片語拂衣還自笑。千金擲帽不知憐。老來俠骨偏騰上。不作頑仙作劍仙。其四云。白下藏名七十年。笛牀燈舫博樓前。襟懷天下三分月。囊篋開元半字錢。蔭藉金張那可問。經過趙李總堪憐。麻姑送酒拚同醉。且作人間狡獪仙。又題丁老畫像四絕云。瑩瑩繁華雙鬢中。太平一曲舊春風。東坡父老西園女。共識開元鶴髮翁。其二云。髮短心長笑鏡絲。摩挲脣腹帽簷垂。不知人世衣冠異。只道科頭岸接羅。其三云。倚杖鐘山看落障。人民城郭總依稀。聞揩老眼臨青鏡。可是重來了。令威。其四云。獨坐青溪熒鬢絲。小姑何處理蛾眉。畫師要著樊通德。難寫銀燈擁髻時。又丁老行送丁繼之還金陵云。西風颯拉催繁霜。江楓落紅岸草黃。丁老裘纒自白下。賀我八十來江鄉。干戈滿地舟艦斷。五百里如關塞長。閩闕城上晝吹角。閩宮清廟圍旗鎗。腥風愁雲闇天地。飛雁不敢過廻塘。況聞戍守連下邑。塘雞雞犬皆驚惶。江村別有小國士。嘉賓芳宴樂未央。撞鐘伐鼓將進酒。停杯三歎非所當。漢東孫子今爲庶。羅平妖鳥紛披。昌碧

天化日在何許。三千那得花滿堂。丁老執杯勸我飲。請開笑口毋徬徨。我家添丁號長耳。三歲只解呼爺孃。公今男女並玉立。開筵逐日分輩行。已看令孫就東閣。更有快婿升東床。維摩天女並瀟灑。木公金母相夫將。彭城老祖年八百。曾孫八十真兒郎。趙州明年始行脚。太公滿百方鷹揚。庭前紅豆旋結實。蟠桃一顆公初嘗。且垂雙眉覆塵壙。共瞳老眼看滄浪。我聞垺牌起稱善。大笑敬舉君之觴。酒酣摩腹訂要約。百歲未滿須放狂。古人置酒便稱壽。何待燕喜吹笙簧。老人頑鈍未得死。南郊正報垂星芒。明年清秋再過我。投衣拍手談滄桑。乳山道士八十二。頭童眼眇學力強。桐城方生年五十。詩兼數子格老蒼。二公過從約已宿。聞阻正苦無舟航。歸攜此詩共抵掌。相顧便欲凌莽蒼。君如再鼓京江柁。方舟定載林與方。見有學集

丁繼之扮張驢兒娘。張燕筑扮賓頭盧。朱維章扮武大郎。皆妙絕一世。丁張二老并壽九十餘。虞山題三老圖詩末句云。秦淮烟月經遊處。華表歸來白鶴知。不勝黃公酒壚之歎。

曲中狎客。則有張卯官笛。張奎官簫。管五官管子。吳章甫絃索。錢仲文打十番鼓。丁繼之。張燕筑。沈元甫。王公遠。朱維章。串戲。柳敬亭說書。或集於二李家。或集於眉樓。每集必費百金。此亦銷金之窟也。見板橋雜記

張燕筑

牧齋贈張叟燕筑詩云。碧雲紅葉夢迢遙。那有閒情付却要。曾向天家偷花笛。親從羸女教吹簫。一生花月張三影。兩鬢滄桑郭四朝。多謝東風扶素髮。春來吹動樹頭飄。其二云。曲江野老復何爲。調笑排場顧影時。地上白毛如短髮。天邊青鏡與長眉。秦淮明月金波在。靈谷梅花玉笛知。繡嶺宮前歌一曲。春風鶴髮太平期。見有學集

沈公憲

沈公憲以串戲擅長。同時推爲第一。王式之中翰。王恆之水部。異曲同工。遊戲三昧。江總持柳耆卿依稀再見。非

如呂敬遷李仙鶴也。見板橋雜記

徐青君

中山公子徐青君。魏國介弟也。家資鉅萬。性華侈。自奉甚豐。廣蓄姬妾。造園大功坊側。樹石亭臺。擬於平泉金谷。每當夏月。置宴河房。日選名妓四五人。邀賓侑酒。木瓜佛手。堆積如山。茉莉珠蘭。芳香似雪。夜以繼日。恆舞酣歌。繪巾鶴氅。真神仙中人也。弘先朝加中府都督。前驅班劍。阿導入朝。愈榮顯矣。乙酉鼎革。籍沒田產。遂無立錫。羣姬星散。一身子然。與傭丐爲伍。乃爲人代杖。其居第易爲兵道衙門。一日與當刑人約定杖數。計償若干。受杖時。其數過倍。青君大呼曰。我徐青君也。兵憲林公駭問左右。左右有哀王孫者。跪而對曰。此魏國公公子徐青君也。窮苦爲人代杖。此堂乃其家廳。不覺傷心呼號耳。林公憐而釋之。慰藉甚至。且曰。君倘有非欽產可清還者。本道當爲查給以終餘生。青君整首謝曰。花園是某自造。非欽產也。林公唯唯。厚贈道之。查還其園。賣花石貨柱礎以自活。吾觀南史所記。東昏宮妃賣蠟燭爲業。杜少陵詩云。問之不肯道名姓。但道困苦乞爲奴。嗚呼。豈虛也哉。豈虛也哉。

李貞麗

李貞麗者。李香之假母。有豪俠氣。嘗一夜博輸千金立盡。與楊羨陳定生善。香十三亦俠而慧。從吳八周如松受

歌玉茗堂四夢。皆能妙其音節。尤工琵琶。與雪苑侯朝宗善。閩人兒某者。欲內交於朝宗。香力諫止。不與通。朝宗去後。有故開府田仰。以重金邀致。香辭曰。妾不敢負侯公子也。不往。蓋前此閩兒恨朝宗。羅致欲殺之。朝宗跳而免。并欲殺定生也。定生大爲錦衣馮可宗所辱。見板橋雜記

卞玉京

玉京道人。莫詳所自出。或曰秦淮人。姓卞氏。知書工小楷。能畫蘭。能琴。年十八。僑虎邱之山塘。所居湘簾。斐几。嚴淨無纖塵。雙眸泓然。日與佳墨良紙相映徹。見客初亦不甚酬對。少焉諧謔間作。一座傾靡。與之久者。時見有怨恨色。聞之輒亂以他語。其警慧雖文士莫及也。與鹿樵生一見。遂欲以身許。酒酣拊几而顧曰。亦有意乎。生固爲若弗解者。長歎凝睇。後亦竟弗復言。尋遇亂別去。歸秦淮者五六年矣。久之有聞其復東下者。主於海虞。一故人生偶過焉。尙書某公者。張具請爲生必致之。衆客皆停杯不御。已報曰至矣。有頃。廼車入內宅。屢呼之終不肯出。生快悞自失。殆不能爲情。歸賦四詩以告絕。已而歎曰。吾自負之。可奈何。踰數月。玉京忽至。有婢曰柔柔者。隨之。常著黃衣作道人裝。呼柔柔取所攜琴來。爲生鼓一再行。泣然曰。吾在秦淮。見中山故第。有女絕世。名在南內。選擇中。未入宮而亂作。軍府以一鞭驅之去。吾儕淪落。分也。又復誰怨乎。坐客皆爲出涕。柔柔莊且慧。道人畫蘭。好作風枝婀娜。一落筆盡十餘紙。柔柔承侍硯席間。如弟子。然終日未嘗少休。客或導之以言。弗應。與之酒。弗肯飲。踰兩年。渡浙江。歸於東中。一諸侯。不得意進柔柔奉之。乞身下髮。依良醫保御氏於吳中。保御者年七十餘。侯之宗。築別宮資給之良厚。侯死。柔柔生一子而嫁。所嫁家遇禍。莫知所終。道人持課。誦戒律甚嚴。生於保御中表。

也。得以方外禮見道人。用三年力刺舌血爲保御書法華經。既成。自爲文序之。縑素咸捧手讚歎。凡十餘年而卒。

墓在惠山祇陀菴錦樹林之原。見吳梅村詩集

下賽一名賽賽。秦淮名妓。後爲女道士。自號玉京道人。知書工小楷。擅畫蘭。喜作風枝婀娜。一落筆盡十餘紙。尤善鼓琴。年十六遊金閨。居虎邱。湘簾柴几。地無纖塵。見客不甚酬應。若遇文士。則諧謔間作談論如雲。一座傾倒。尋歸秦淮。亂後復遊吳。作道人裝。侍兒柔柔。靜好女子也。承奉硯席如弟子。未幾渡浙江。歸於東中一諸侯。不滿意。進柔柔當夕。乞身下髮。復歸吳門。築別館以居。長齋繡佛。持戒律甚嚴。管刺舌血書法華經一部。又十餘年而卒。葬於惠山祇陀庵錦樹林。見板橋雜記

寇白門

寇湄字白門。秦淮名妓也。娟娟靜美。跌宕風流。工度曲。善畫蘭。略解拈韻。能吟咏。年十八九時。爲保國公購之。藏以金屋。如李掌武之謝秋娘也。明季甲申三月。京師陷。保國生降。家口沒入官。白門以萬金贖身。匹馬短衣。從一婢。歸爲女俠。築園亭。結賓客。日與文人詞侶往還。酒酣耳熱。亦自歎美人之遲暮。嗟紅粉之飄零也。既從揚州某孝廉。不得志。復還金陵。老矣。猶時召諸少年流連觴詠。未幾病卒。錢牧齋金陵雜題云。叢殘紅粉念君恩。女俠誰知寇白門。黃土蓋棺心未死。香丸一縷是芳魂。又某詩云。寇家姊妹總芳菲。十八年來花信迷。今日秦淮恐相值。防他紅淚一霑衣。則寇家多佳麗。白門其一也。見板橋雜記

寇白門南院教坊中女也。朱保國公娶姬時。令甲士五千。俱執絳紗燈。照耀如同白晝。國初籍沒諸勳衛。朱盡室

入燕都。次第賣歌妓。自給。姬度亦在所遣中。一日謂朱曰。公若賣妾。所得不過數百金。徒令妾落沙叱利之手。且妾未卽死。尙能持我公陰事。不若使妾南歸。一月之間。當得萬金以報。公度無可奈何。縱之歸。越一月。果得萬金。

見陳其年婦人集

鄭妥娘

鄭如英字無美。小字妥娘。工詩詞。與下寮寇湄相翹翹也。桃花扇傳奇。眠香選優等劇。以阿丑之談諧。作無鹽之刻畫。肆筆打譚。若瓦街陋姝。一丁不識者。然殆未深考。虞山金陵雜題。舊曲新詩。壓教坊。縷衣垂白。感湖湘。間開閨集。教孫女。身是前朝鄭妥娘。板橋雜記。謂頓老琵琶。妥娘詞曲。祇應天上。難得人間。見香東漫筆



言情小說

世界書局發行

桃花扇演義

江蔭香著 一冊七角

琵琶記演義

聶醉仁著 一冊五角

電術奇談

吳研人著 一冊六角

妖術奇談

無敵羨齋 二冊七角

紅淚影

息影廬主 四冊一元八角

中華民國八年一月廿七版

桃花扇演義 (全一册)

附名人小史

【每部定價銀七角】

(外埠酌加郵費匯費)



分發行所

北京 天津 濟南 煙台 奉天 保定 邢台 綏遠
 太原 衡州 南寧 重慶 武漢 漢口 宜昌 長沙
 常德 衡州 南寧 重慶 武漢 漢口 宜昌 長沙
 徐州 蘇州 無錫 杭州 嘉興 寧波 溫州
 廣州 廈門 汕頭 梧州

著述者 夢花館主江蔭香
 眉批者 聽鷗軒主陸雲伯
 印刷者 世界書局
 發行所 上海四馬路中市
 總發行所 上海四馬路中市

世界書局

H 82

3114

